

١٩- أكثر حاجة بتلخبطني لما أشوف إللي ظلمني بينجح

ومتألق وعایش حیاته ! فین عدل ربنا ؟؟

غریزه بشریه إنک تنتظر تشوف المأساه إلی هیعشها إلی
ظلمک ..

مش من باب الإنتقام لكن من باب جبر خاطرک .. ولوده
محصلش أو حصل العکس وتلاقیه کمان متألق ومن نجاح لنجاح
،قلبك بیوجعک وبتحس بقهر ویمکن لوم خفی بینک وبین ربنا ..

لیه یا رب کده؟ هو ده العدل؟!

صح ؟ مش ده إلی بیحصل ؟!

هحکیلکم قصة رواها شیخ ،عن شاب أذنب ذنب وسمع من
شیخ إن لكل معصیه عقاب .. فإنتظر العقاب وترقّب یوم ویومین
و أسبوع وإسبوعین، والأیام بتعدي ومفیش عقاب .. فناجی ربه
ربي لقد عصیتک فلم تعاقبني؟!

فقال .. وقع فی قلبي ، أنا یا عبد قد عاقبتک ولم تدری !

ألم أحرمتک لذة مناجاتی ؟ ألا یکفیک أن أحجبتک عني ؟!

(كَلَّا إِنَّهُمْ عَنْ رَبِّهِمْ يَوْمَئِذٍ لَمَحْجُوبُونَ)

صعب تستوعب إن ده عقاب صح ؟!

إنت كإنسان عايز شيء مادي ملموس يشفي صدرك !!

فشل .. وجع .. خساره .. أي حاجة من الحاجات إللي تفهمها !

الفكره إن الدروس دي بتحصلك علشان تتعلم منها وترتقي بالصله بينك وبين ربنا وترتقي بقلبك وإلا هتكون دروس للوجع والمعاناه وبس!

صدقني المتع الظاهرة في الدنيا مش مقياس أبداً للنعمه !!
ركزوا في الآيه دي :

(فَلَمَّا نَسُوا مَا ذُكِّرُوا بِهِ فَتَحْنَا عَلَيْهِمَ أَبْوَابَ كُلِّ شَيْءٍ حَتَّى إِذَا فَرِحُوا بِمَا أُوتُوا أَخَذْنَاهُم بَغْتَةً فَإِذَا هُمْ مُبْلِسُونَ)

سبحان الله الآيات دي عكس إللي نفسك فيه بالظبط !

عقابهم لنسيانهم قوانين ربنا وإصرارهم .. هو إن ربنا يفتح عليهم كل الأبواب والمتع لحد ما يفرحوا!؟

تخيل !

لإن متع الدنيا و مقاييس الفرحه بحساباتك مختلفه تماماً عن الحقيقه إللي أغلبنا بنجهلها ..

المتع والراحه والسعاده والطمأنينه والأمان .. فقط مع الله وباللله ..

وأي مظاهر أخرى خادعه ومش مقياس لأي شيء ..

(وَلِمَنْ خَافَ مَقَامَ رَبِّهِ جَنَّاتٍ)

جنه تعيشها في الدنيا قبل الآخرة في عز الظروف الصعبة

أو أي فقد وأي ظلم .. لكن تقدر تدوق الجنة بحسابات

تانيه خالص بينك وبين ربنا ..

إياك تفكر إن أي لحظة ظلم ووجع هتروح كده ، لمجرد إنك

بنظره قاصره شايف إللي ظلمك .. عايش حياته !

(كَلَّا إِنَّهُمْ عَنْ رَبِّهِمْ يَوْمَئِذٍ لَمَحْجُوبُونَ)

والله لو أدركت إن ممكن يكون ده عقابه ، هتشفق عليه .. لإنه

عقاب مؤلم جداً وأبعاده مرعبه !

وده يمكن بداية ليك إنت كمان تراجع نفسك ..

ربنا حاجب نفسه عنك ؟ فيه صلة بينك وبينه ولا لأ؟

مش يمكن الظلم إللي إتظلمته أو الوجع إللي شفته علشان

الحجاب ده يتشال !

الخلاصه .. إشغل نفسك بنفسك أولاً ووكل أمرك لله وإنت

مطمئن وواثق وإسعى وجاهد لقلب سليم .. لأن هو ده إللي ربنا

عايزه منك في كل إللي بتشوفه وبتعيشه ..

وأخيراً ..

الراحه أو الألم والنصر أو الهزيمة والفرح أو الحزن شعور
نفسي من جواك، متحكم فيه قلبك وعقلك .. حتى لو الواقع يبيان
العكس ..

(فلو كل شيء إتهزم لكن نفسك منتصره .. فأنت لم تخسر
شيئاً .. أما لو إنتصرت على كل شيء وخسرت نفسك فهذا هو
الخسران المبين)

